

歷代 日記叢鈔



學苑出版社

歷代日記叢鈔

第五七冊

(清) 空六居士撰

遵義平匪日記

遵義平匪日記序

獨山凱撤予隨韓公赴省上憲飭公仍履清江署任閏七月至清八月十六日接到巡撫飛檄知桐梓縣匪徒楊龍喜糾衆作亂占據城垣分攻正安州及仁懷綏陽安南普安等縣仁懷復失飭公身率親練與署丹江參將遊擊烏爾滾珠統帶清江鎮遠台拱丹江四營兵八百五十人合親練百人共九百五十人往勦桐梓中途聞遵義郡城緊急又連接該郡文移敦請救援遂先赴郡以保未失地方川滇之兵亦陸續畢集凡八閱月而事平予逐日紀載彙成一編以備久而遺忘云爾

咸豐五年歲在乙卯季夏空六居士續書

遵義平匪日記

空六居士撰

楊應龍之裔楊龍喜居桐梓之九壩場性狡桀見天下多故武備廢弛陰蓄異志參養健兒操習兵械聞獨山變起遂於甲寅八月舉事先據桐城次陷仁懷安南普安各縣城分兵駐守煽脅日衆分黨攻圍綏陽正安自以大股精銳攻圍遵城紮營雷台山及大因保距城僅數里城外丁字口鳳朝關一帶十里大街民房亦皆爲賊所據欲攻取遵城以窺貴陽先是遵義文武敗績於婁山關狼狽奔回賊乘勢逐北直造城下陶令履誠等率衆出城接仗官軍大敗陶令與遊擊某同時陣亡自此賊燄益張官軍不敢復出人心震恐岌岌可虞

韓公超奉調與烏遊擊統帶四營兵丁赴桐因遵義告急改赴遵義八月二十六日行至團溪水與烏遊擊及各營弁兵會合先因各營奉文在先韓公奉文在後是以於八月十八日自清江起程李千總率清營於十七日起程韓公函約烏遊擊與各營務於中途相候會齊前進並以此意囑李弁面致烏不肯候獨率四營而前比至團溪水聞前路賊沮懼而繞行聞亦有賊復走他途如是者三卒無可行處各弁謂

韓公將到不如回至團溪俟韓到再議烏不得已始回團溪與韓相見韓謂直行繞行均之有賊然繞行路遠而狹且示賊以弱不若直行路近而闊且示賊以不畏我與諸君共事一切共商絕不獨特己見適纔所說諸君之意云何衆曰甚是韓曰既有同心便由龍平徑進明日二十八宿龍平二十九抵遵城我引親練爲前鋒清兵繼之台兵又繼之烏君率丹鎮兵在後前隊遇賊前自禦之中後切勿撓越擁擠而前致亂隊伍亦勿吶喊致相驚疑中隊遇賊中自禦之後隊遇賊後自禦之諸如前隊遇賊之約倘賊分左右來犯亦分左右應敵我自以隨身護衛應援不可倉皇失措確依此約保無他虞衆曰諾

八月二十八日宿龍平募人持書入城語以明日必至凡三往得入者一以賊圍嚴密故也城中大喜徐明府

河清

附書於公謂已定引軍迎至距城五里之豐樂橋

二十九日辰巳間城中復書始至午刻拔營前進霧雨如霧天昏氣冷行三十里探知賊踪不遠軍士腹飢面有寒色或謂天昏不知早暮且衆飢難戰不如駐宿此地明旦前進公心知不可宿此而諸軍烏合之初未相浹洽必須一其心力方可制勝

乃集各營將弁隊目而告之曰天雖昏暗大約不過在未申之間卽與賊戰計時亦能入城惟天冷人飢恐枵腹難以從事似宜宿此明日再進然宿此而賊知我來層層堵截前進殊難甚或以大眾圍偪我營縱我能自守而無處購米但使半日不食加以寒冷詎不危乎則又以今日直抵城下爲是也爾等酌之衆曰我等願直抵城下公謂如此寔爲上策遂行隔山聞賊角聲知賊來拒揮清兵登右山爲犄角勢派丹鎮兵爲清接應自引親練在前派抬兵爲接應頃之接仗殺斃數十人賊遂奔潰賊由獅子橋退入丁字口大街公經橋頭令抬營張弁帶五十人紮橋上防賊突出衝腰截尾並謂中後如有變卽吹號三聲我必以前軍回救且我在城脚等候不先入城爾等放心不可驚惶比中後兵過賊果出見橋上防堵竟蹈淺水過河駐橋者鳴號公以前軍回救斃賊數人賊懼而退

公抵城下徐明府始出城語次請卽入城公不肯將全軍分布城下見隔河民屋藏賊甚多間由窻戶開槍擊我知賊以民屋爲壘謂徐曰不燬此街城必不保募人縱火詎意牆壁高厚雖然而不能延燒乃整隊入城是夜有乘黑還丁字口本宅窺賊

者聞賊相詫曰此軍何處來者如此利害我等難保不如逃去是夜公與地方文武面訂巡城及清查奸細之計

明日與徐議定募人每夜分燒城外房屋雖難延燒究亦愈燒愈稀城外入皆移居城內惜其房屋訴之署守守謂公不宜再燒以失人心公曰賊倚民房爲營並爲雷台山大因保之城郭且緊偪城垣由牖放抬槍可及城上我軍出城打仗多被屋內伏槍轟斃此後軍不敢出戰城上不敢立人此城必失城既屬賊則城外房屋盡賊之物安能復還原主故毀城外以保全此城寔今日上策否則後悔無及守弗然之維時城內士民咸以公策爲善而城外入則否惜物私心惑之也有相識晉李二士寓書相規晉丁字口人邀李聯名寄語公婉詞謝之並謂遵義大局城外房屋不盡賊終不平如房屋漸減則賊勢漸消屋之存亡係賊之消長此際誰信斯言他日請念以後各營紛集前面開仗後面拆屋爲薪屋日少而賊日縮全歸雷台山大因保無復星分棋布之勢是以夜遁當賊勢漸消時晉李來見頗服公之前言符合九月十三十四十五十六日公率所部出城至獅子橋與賊接仗並督燒房屋殺賊

多名奪獲槍砲多件

九月十八日徐練與營兵由紅花岡打下攻擊豐樂橋賊營韓軍打獅子橋一帶午刻徐軍敗北公揮清江兵往援清兵唐萬斌勇敢直前打上紅花岡賊敗遁唐萬斌卽拔補外委

先是韓徐議定韓出右攻紅花岡以下徐出左攻獅子橋一帶旣而徐念韓每出右而勝乃請以右路讓已公諾之並誡之曰兩軍隔山不知進退難相救援約有失卽吹角以便聞而分援及徐軍吹角公在獅子橋鏖戰急派清兵馳救比徐大敗唐萬斌已至故徐與殘軍得狼狽入城倘救至稍遲則事不可問

提督趙萬春署藩司炳綱率千餘人援遵行至螺螄堰紮營未畢忽賊由兩山來撲炳及隨員戰慄失措趙懸重賞募人曰打退賊匪賞千金兵役奮勇直前賊懼而退炳自此回省

承觀察齡爲人篤實平正事有失知自咎獨役四月功成宜也糧道承志妨賢嫉能日短齡于三大憲遵變初起謀帥志謂齡不可用意欲用已而中丞不允中丞因志

既難用欲用孔廉訪志恨孔不薦已遂並沮孔而薦附已之署藩炳綱中丞允之炳至螺螄堰見賊魂飛魄散伏地不能起衆扶掖之始呻吟曰遵義我不要了遂折回省城孔因力薦齡設使志炳爲帥則豪傑屈抑宵小恣睢定至喪師辱國人謂炳之中折回關黔中氣數誠然

趙徐行至離城二十里地方紮營不敢遽進駐紮既久城外日日戰鬪趙若弗聞一日率數百人來城一視片刻仍回出城剛數里爲賊所圍公正在獅子橋與賊相持聞之分軍往救趙得歸營

一日趙又來城意欲不復回營左右見賊勢浩大恐困在孤城難出牢檻勸趙回營趙惑之住數日欲行公探悉賊知趙不能軍所部軟怯議邀之中途力阻趙勿遽行俟數日後賊防稍懈某率練護送方保無虞趙然之城守彭副將亦甚以公言爲是一日向夕彭見公曰聞明日提臺仍行奈何此事惟兄可挽公夜見趙縷陳賊謀並趙所部難恃之狀且謂出必遇賊遇賊必敗切勿輕行趙感謝之至謂決意不行矣明旦公猶未起彭來告曰昨夜兄言趙深信不料兄出門後左右慫恿竟復變計於

四更啓城潛出不半里一守號火者睡中譖語曰賊來矣快逃快逃兵丁驚惶返走叩城門甚厲陳弁疑問兵丁兇詈以刀擊門乃納之趙後至陳問何故趙謂並未遇賊不識因何驚退及趙陳細訪始悉趙服兄先見深悔不聽兄言慚慙無地欲親來負荆恐兄不以人類視之拒弗與見求弟先爲致意公曰不患有過患怙過今果知悔甚佳我卽往見彼不必來彭謂不必往見彼來爲是彭去須臾與趙偕來見公稽首謝罪願結金蘭謂此後惟命是聽後數日賊氛少戢公率軍出巡使趙乘勢回營無復沮截一日趙營投効千總高天澤率百人哨賊被圍公派軍往救得脫高滇人頗勇敢

十月內公屢在螺螄結鳳凰頭空閣寺一帶打仗殺賊甚多一日得勝後收軍將至東門遙見小龍山徐軍大敗賊追殺甚急先是徐久未出隊是日情愿紮隊小龍山觀戰並爲公防左路賊抄約收隊時兩軍齊退賊旣爲公所敗欲取償於徐軍收軍時尾追之徐軍大潰公派隊目楊紹賢陳登明等率百人馳往救援自率大軍隨後策應百人猱升小龍山陳楊如驂而進悍賊執大刀在前乘高勢下撲陳失足倒地

悍賊方舉刀陳矛丈餘因臥地不能刺近以矛橫擊賊負痛身歆楊乘勢縱矛悍賊立斃陳起與楊連斃數人賊大奔而去徐得生入北門

公周視地勢繫城之安危者莫如紅花岡抵遵數日卽欲出城在紅花岡紮營而烏遊擊與弁兵皆不願百般沮止所以屢議出而不果以後賊渠李七率衆三登紅花岡窺看城內且擬駐營於此亦皆未果公恐岡爲賊所占心急如焚用計誘所部出紮營壘既定楊龍喜深尤李七之不先占要地李七不服遂與楊分軍李七帶千三百人向城南襄脅頗恣淫虐士民憤之聚衆追逐圍於水口寺賊衆殲焉先是士民信賊僞示以爲眞行王道不害閭閻故官使齊團面從而已自水口寺一戰後始皆齊團殺賊

一日賊由前面來犯公親禦之於距營里許之地賊退而復進相持二時忽大因保之賊繞城抄我營之後公聞卽飭禦前面者穩紮勿動自以精銳迎擊由後來抄之賊趙營高弁天澤亦率所部迎擊賊遁歸大因保前面賊亦退去

是時趙提督五營皆紮城外賊日來擾趙軍屢敗每賊遂北皆賴公率親練救援危

急之時清台丹鎮之兵不能得力公憂之乃遣弁赴下游募勇欲自成一軍營兵但令守壘所募未至之時趙軍日敗滇軍亦僅能自守一日辦事文武集協署議戰公不言衆固問公曰能依吾言明日必克衆謂但言之無不遵依公曰賊狃於屢勝且料我必不往攻防範必疎今夜三更造飯四更動身伏於賊之附近隱匿火繩勿言勿噓黎明襲之無有不捷須簡軍二枝同時分襲雷台山大因保不可違誤衆善之議定趙派軍襲雷公軍與定廣兵襲大手寫軍帖分授各將弁誠曰依此必勝違則敗是夜公率衆潛出伏賊附近見賊營燈火聞梆鑼傳箭聲甚悉又聞十餘步外有賊閑語知是睡覺而語於屋者申誠勇兵隱火勿言噓欲噓則以袖口籠口鼻俾聲弗彰甫辨路崎嶇之至蛇行雀躍而前離營數十步賊始覺驚呼忙亂我軍大呼齊進賊營三座頃刻踏平分逐逸匪並焚其積聚此策先告之承觀察後方質之大衆大因保一帶肅清正擬收軍城內彭協函致謂趙出隊違約日高方出且吹角號召恐將失利囑公稍緩收軍分歧賊勢趙方不甚孤立公依言停止頃之彭又函報趙已大敗請公速回以防雷大二股合犯公乃安排徐退之法使右軍在後抵拒不動

自執旗於五十步之前插地使左軍進紮旗處如右軍之抵拒不動然後又插旗於左軍前五十步之地使右軍進紮旗處更替徐行賊醫聚追來不敢近逼是時不見烏遊擊疑其落後命停軍待之軍士曰先此數刻彼已飛馳入城矣

離北門數里衆欲由正路公曰正路雖近然路狹山夾賊若登左右山梁以木石下擊我軍必亂右梁雖稍遠兼有仰躋之勞然不受賊制於是由右登山賊無如之何尾追與已登左山者皆退去是日趙軍違約賊覺而迎戰趙軍大敗斃者數百人川兵克復仁懷溫水桐梓踏毀九壩老巢黔軍團練於蒲老場等處屢次克捷而攻打雷台山諸軍又連日鏖戰將賊所踞街房漸次燒盡賊失所恃公復遣人夜夜驚擾賊營賊窮蹙日甚又于十二月十五日收軍時使聲洪者昌言其日蹙情形以搖其心賊等始欲逃遁是時公所募新勇未至十六日諸軍戰酣齊進將及賊營賊忽出奇兵一枝僞爲新募之韓勇徐行而介處衆官軍之間問誰家人何處來對曰新募韓勇昨日至紅花岡今日出隊韓親練聞而詰之賊卽喊殺傷官軍數人官軍驚退賊逐之攙雜之間賊不辨兵未卽斫刺兵不辨賊不知所拒官軍退入山溝過小

山下時公坐小山督戰亦難辨賊是何人喝問兵勇曰賊並不多爾等何不回禦衆
停足曰不知誰是賊公佯舉手指在後者大呼曰彼即是賊爾等殺回我有重賞賊
聞之意公在高處真識之也懼而同走兵勇返逐賊潰是時僞爲韓勇之賊渠執大
白旗在後督戰見其黨潰亦執旗徐退公身邊一兵善放九節力大砲當賊進追時
公飭燃砲轟賊後繼沮其前進賊畏之比賊潰退一砲擊斃執旗賊渠白旗倒地賊
黨大驚搶尸而歸

是日收軍後公新募之勇四百餘人到營賊連旬鏖戰死傷之餘疲憊殊甚聞九壩
老巢爲川兵所破兼聞公添勇一千更爲奪氣是夜三更燒營而遁

十七日公點驗新勇簡放頭目編成隊伍申明軍令十八日操演陣式

傳聞賊竄磨盤山十九日拔營前進沿途搜殺賊黨七八十人至混子場知賊未竄
此寔係西竄安底與另股逆酋王三乍巴合夥圍攻黔西州城於是折回駐遵一日
正擬西出奉到巡撫檄文謂省城空虛恐賊由黔西突竄省城飭公迂行由札佐渡
六廣再向黔西以遮護省城公于二十九日抵洛邦三十日單騎赴札佐見巡撫因

獨山案保奏以知縣用及同知銜花翎巡撫諭換頂翎正月初一日還洛邦

鳥見公頂翎族甚此

後多方欲敗公之事

五年正月初三日拔營沿途搜殺賊黨抵黔圍已解賊酋陳小霸王斃於城下餘賊

竄大定府

初二日丹兵以索餉爲名齊赴札佐乃烏所嚇也公止之

正月十七日公抵大定賊竄畢節旋又折向東南公深虞其徑入粵西難於越境勦辦是時帶兵追賊者共七八股公函商諸軍謂各股尾追終不能及須有一二股攔頭方可沮賊入粵今擬我攔賊頭諸君綴賊尾何如衆是之公於是探賊所向繞行以出其前經六歸河平遠州定南一帶十九至洛別聞賊趨扁担山公遂迂路趨鎮甯州二月初二日駐營黃果樹是夜有一赤鳥大如雁紅如火去地三四丈由西北飛向東南遠不能見須臾復飛向西北如是者三卒由東南遠逝初三至巴路聞賊踰扁担山未遠卽刻追去忽風雷交作大兩雹公收軍紮營

探聞賊在坡貢初五日拔營赴坡貢賊早餐未畢聞韓軍至放箸遽走公急追之行五六里至枒口山山甚險峻徑尤崎嶇賊盡脫所著紙甲拋棄山徑意圖便於登陟

既登見山險可據有一夫當關萬夫莫過之勢遂盡力死守欲與公軍決命公見山勢難躋賊布置嚴密仰攻非易乃派烏旗黃白旗等隊潛出右路抄賊之左派賈都司率所部四百餘人出左路抄賊之右自率藍紅旗等隊由正路攻山另派鄧守備率鎮兵踞背後一小山開大砲遙轟以壯前隊聲勢兼爲應援山徑斜上賊列火器於徑口又由斜徑之上滾石下擊一石滾下遇石卽磕動節節磕動比及地遂有數石滿山翻動旋滾聲似雷鳴我軍被傷數人滾石連至公腳邊左右苦勸公稍退五六步在小橋之北督軍公謂前隊正貼身山脚力戰石過頭上猶不肯退况但至腳邊乎軍士聞之神色益厲正在相持右出之奇兵已登刺倒二賊賊旗返走公見之大呼謂前隊曰烏旗已登賊已返奔爾等何不速上遂一擁而登賊大敗死傷枕藉棄馬匹衣物而走公命一面追逐一面索近處山林搜擒百餘人立時斬首所得馬匹衣物不許取携正在指揮突有一軍由枒口寨出而西行頭目楊紹賢訝曰得非賊耶公曰或是賈兵方至宜審視之楊前行數武審視曰果賊也賊至此始喊殺馳進楊持矛迎之與當先賊酋一交手賊矛墜手撥楊矛急進一手揪楊髮辮一手抽